

顏氏家藏尺牘

壹

14  
1475  
74



74 12  
1472

道光丁未鐫

顏氏家藏尺牘

姓氏考附  
海山仙館藏書

昭和十五年  
一月二日  
購求

門 14  
號 1475  
卷 74 75

蘇方家藏尺牘卷一  
蘇山翰林書

蘇方家藏尺牘

蘇方家藏尺牘

顏氏家藏尺牘卷一

馮太傅溥

前承大翰已有小札奉復想久塵記室矣不佞以耄年  
久病復荷簡命謬主文闈惟恐隕越無當以貽知己羞  
幸榜發之後論無異同差違罪戾獨失之於令弟以是  
為愧耳所恃高明諒之於形跡之外也屢煩注念裁答  
稽遲以無人索回字且值不佞冗無暇晷更衰老忘  
事也惟照不一賤名另具

遠承芳訊足仍不忘兼領大杯之惠謝謝衰病相仍未

能脫離塵鞅日望鋒車至止從吉在何時耶近吳逆已  
亡休甲有日且海內人文雲蒸霞蔚鱗集京師真千古  
盛事惟祈台駕速發馳驅王路共襄太平耳冗次率復  
不盡欲言

龔尙書鼎孳

奉別經年圖晤不遠茲偶值程舍親回里取道金陵喜  
得藉爲鱗鴻以通芳訊故蹙然而治一函舍親誼在水  
乳倘蒙進而教之弟與有榮施矣馮池主臣名單具  
曹侍郎溶

歸讀大集沉雄傑出直欲囊括千古壓倒時才小巫爲  
之心悸然疲懦有所激發亦將力索枯槁仰繪日月也  
里人范成閒從弟至此書畫十數種足充清玩其人樸  
實無文以法鑒定價值當奉教惟謹耳餘留面罄  
近代史書邸鈔之外必以家乘爲憑昨誦雄文甚爲忠  
烈生敬完上附謝弟溶頓首

葉尙書方藹

終年碌碌未獲時候孝履忽辱大教注念殷殷媿荷交  
并曷可言喻拙文鄙儻無似深懼上玷名賢有負仁人

孝子之託乃蒙不棄採而用之益不勝其悚仄也使旋  
匆匆率勒奉復伏惟垂鑒不一  
比承老先生來訊審知孝履安善甚慰委撰先公墓表  
久不報命非敢忘也懼一時草率無以副仁孝之意也  
既又思之世之有可言者必待乎能言而能言者尤必  
得夫可言者爲之言然後其言信夫所謂能言者非獨  
學問之博而文詞之美也惟其是非好惡一本人心之  
公而不徇時俗爲去取爾藹之學問荒矣文詞陋矣獨  
其硜硜之鄙不敢背公道而輕徇時俗則幸自反而無

愧焉然能言之人不常有而可言之事又不常遇生平  
讀書見古人忠孝大節必爲咨嗟涕洟稱道誦說况同  
吾世有至行卓卓如先公者又辱其後人不棄命操筆  
紀其事豈非踴躍恐後者哉竊有一言不敢不奉陳者  
昔年河間之破實因王師再入關而行述中但云畿南  
亂而已竟不言其亂爲何則使後之傳忠孝獨行者何  
所據以成信史也從來兩國兵爭仁人志士舍生殉義  
者何限前朝之節烈獨非 本朝之深嘉尙者乎亦何  
所諱也輒以鄙見撫實書之謹錄藁一通寄上至於識

慮淺闇詞不稱意有負所委忸怩亦何可云伏惟垂鑒  
不宣藹再頓首

高侍郎辛允

承垂注已佩德矣此謝諸凡幸自愛婆心區區不盡

劉參議思敬

昨晉拜時遇一舍親泊河之干未防船滑落水衣履盡  
濡是以踵門弗便面晤深以爲歉舊日筆墨所記偶相  
知者刊一種奉公暇寓目尙未印行也有未當并希商  
示以正其訛至感容再面悉名單肅

劉考功體仁

使車駐山水之勝勝友必多朝夕得佳句所獲已侈不  
必更問阿堵矣弟汗漫江南自春抵冬今始返棹邗溝  
然不敢入石門一步者恐客多無以應也揣价代躬走  
賀兼有恃誼之懇春初在江甯物色得二人尙可供  
書卷旁頤指今欲北歸勢不能緩而力又不足倘老年  
親翁假以一數吾事豈不大濟已乎密之不須向人道  
也明歲二月當再晤以悉弟昨在吳門乃聞孔親家至  
舍而弟失候至今耿耿近况各何如幸示爲慰弟吳江

一路頗有所作匆匆不及繕寫容他日請正

阮亭冒雨見過念吾脩來當共談幸惠然卽至爲望脩  
來先生小弟體仁頓首

沈侍郎荃

金馬追隨渥承雅眷睽教未久頓易星霜伏諗兩年翁  
秉濬冲之至性篤莪蓼之深情雖備極哀榮而依然孺  
慕弟以塵韉碌碌未遑蒔蕪緘一慰孝履懷耿之切  
與日俱長茲敬捧瑤華兼拜隆誼仰惟摯愛不敢言辭  
大老先生窮碑題字謹如來式盥手以書丙舍題額亦

率塗附交來使矣但中間款項或有未妥并立石年月  
或秋或冬未奉確示另備數字屆期酌配何如匆匆布  
復並謝至意憑楮神馳弟荃再頓首

昨逐隊而行未免困頓一應交際之事尙覺疲苦以故  
咫尺衡宇而猶未敢趨叩也舍親咨文已送到聞旦晚  
尙須題請不識何時可以咨入成均也伏懇留神統俟  
面時九頓不盡

聞咨送之文昨已用印感荷至誼曷有極也薄犒一緘  
聊爲尊伴煙資并照不盡

所事聞農部已咨發貴衙門矣闈期在即願望台慈多方噓護早賜允咨感不獨舍親一人也諸容面頌弟荃頓首

茹凡所託承老年翁台諭卽欲爲之作札所有委折竟爾忘却望再詳示之不一弟荃頓首上  
虛火上攻頭面作腫卽靜卧尙不能支况有筆墨事紛紛未了乎悶極悶極顏年翁七律高華秀朗正如瑤臺嬋娟見者皆知其妙不止格律之精當也二札已題率復先君子崇祀欲求顏年翁佳作增重不審可許我否

門年家弟荃頓

奉別未幾頓移時序還老入都不識曾道及否弟輩黽勉從事幸已告竣所拔者皆潛處力學單寒孤苦之士想老年臺早已悉其大略矣今因解差之便遣奴入北總仗留神照庇目下尙有正事未竣來月初當返敝鄉長至前卽束裝歲底可握晤以罄積懷也憑楮切禱來僕甚蠢諸凡望爲周全切祝切祝貴房師佺老此時想亦未回同時并致意外附闡墨拾冊奉覽

鑿坡奉別之後復感寒伏枕駕過失迂委冊亦稽報命



為罪茲端伴上繳乞賜察收聞大集已付剗劂何時得  
惠教也附訊不一弟荃載頓首

繆侍講彤

瓜步道中過承惠恤故人之誼令人銘刻歸來忽忽三  
年不及以尺素候問起居殊深懷想令叔岳孔先生遠  
臨敝里得接手教知近履佳勝承台委竟作子虛人情  
薄於秋雲而令親不無金盡裘敝之歎在弟處那移貳  
拾餘金稍資行李然而困頓極矣瀕行草此數行奉復  
臨楮翹企

好雨生涼儘堪劇飲明日候車騎早過干祈攜綠綺來

一踐疇昔之約兼可為弟驅病魔也望望弟彤頓首

承諸位年兄盛意至再敢不祇頌惟日內炎風正暑斗

室促坐無可為樂略竅微雨新涼當以浮瓜邀快談也

率此容面罄弟彤頓首

一飯草草甚以不得罄歡為悵尊分萬不敢當併祈一

一致之諸年兄鄙衷昨已面吐幸有以諒之也率此不

一

伏枕偶得二詩書呈大方郢正興會必佳得賜和教尤

感也修老年兄弟彤又言

昨候起居不得面侍色笑爲快卷在何日解科望年兄  
赦使一諭經承恐駕回則于君卽謝事又需有待也特  
此再瀆專候明示弟心肅

昨承賜顧未獲趨謝爲罪新選同人向有公酌不知近  
尙舉行否如無則年兄必有專席弟以欲附賞合行未  
識可否望示下諸不一

梁師伯於廿四日行有啟卽可附去同人公候甚爲切  
當祈年兄卽作一稿付弟謄寫與來价可也弟連日賤

體病極非敢於方命耳率復脩老年兄大人小弟彤頓  
首

弟因歲事倉皇拮据略無空晷實不能操管作駢句轉  
懇一友捉刀以應臺命苦不能工惟年兄名手點易用  
之可也率復不一修翁年長兄弟彤頓首

弟有許語欲奉商確特走候不得一晤爲耿過三日當  
再圖過訪也弟移寓在東首打磨廠眞君廟對門夏舍  
親相隔十里會面爲艱奈何奈何年兄諸凡行止有便  
幸以尺一示弟千懇千懇修老年厚兄弟彤啟頓首

刻下在此候一回信不得走高軒的在明午後趨教也  
特此先覆弟彤啟頓首

度歲碌碌無停晷不得走晤為快尊章遲閣良久可勝  
罪歉值此心緒匆忙勉就一面請教餘俟春明一一補  
過堂聯書梁夫子句想定有當尊意也脩老年兄弟彤  
啟頓首

徐尙書乾學

久疎教言時切瞻企偶於啟奏時一晤芝字又勿獲暢  
談乃朝夕鹿鹿良覲頗稀悵歎曷極茲有至親姓名仰

懇知屬瑣瑣可鄙然有不得不為轉煩之苦情輒敢恃  
愛奉瀆伏望俯俞具感高誼倘老世翁未能全允或將  
其一轉托貴同人必期有當為禱湖上隆情尙未奉報  
至今耿耿然中心藏之無日敢忘也原欲走叩面懇恐  
不相值崙此布瀆臨啟虔悚

前慢甚為歉舍弟谷照已領入特囑致謝忠義卷目并  
四書解四種奉上諸容叩悉不具侍乾學頓首

郝尙書惟訥

曩獲朝夕聆教幸寡愆尤別後典型日遠蒞事維煩以

庸拙之夫處艱劇之地將來不識作何稅駕也正愧未  
達數行虔訊孝履忽承台翰意氣懇懃把讀再三殊增  
感激追跪展太老先生傳銘盥漱細誦允堪革薄起懦  
百世猶將賴之奚止裨一時之世道人心也耶東望泥  
首莫知所頌肅此奉復臨池悚切

相去千有餘里歲華屢更雖彼此神依非山川所能間  
隔而握晤維艱無日不倦倦於懷也接台翰恍如面承  
稍慰積悵弟向以冗病之故已苦支離近復多所不堪  
更覺頹憊而不能自解惟望高賢到署得奉指南幸老

年翁善自頤養早命鋒車無使弟輩久爲引領也辱委  
尊筵弟素不能書稍遲容覓人代揮寄去虔勒附復臨

穎瞻湖

吳侍郎元萊

一別數年時深懷想昨聞旌節入長安弟以外吏勞勞  
匪朝伊夕覺人事過疎而功令是凜遂罪積如山莫可  
追也老先生寅年臺或亦諒其生平而不加督責耶遠  
承手諭如對芝眉復荷渥儀安敢濫拜唯心銘良友之  
至愛而已別諭自不敢勞台慮此弟所藉以安靖地方

之賢技也况叨梓里乎敬聞命矣匆匆不及多緒容面再佈可耳臨啟依切

容臺共濟雅賴同心素旒言旋未遑馳送迄今耿耿老年臺情纏孺慕至性過人不肖深以為念頃接手言得聞孝履遠懷差慰太老先生純孝天成人倫師表垂諸史冊照耀千秋承頒墓表兼以傳辭讀之肅然起敬但天不憖遺彌增哲人云萎之歎耳不肖逐隊碌碌寸長罔效引退難言忝竊滋懼未知年翁何以教我豚兒僥倖非台庇不至此伏蒙垂注感荷無已殊卷呈教郢削

幸甚臨啟瞻馳

孫侍郎承澤

秋霽可喜吾鄉之災貴縣稍輕家中有人來否知闔宅納吉也出署後乞時過一譚宜兄事若何此時或無暇及此也不盡澤頓首

連未得晤為歉七日齋中瀹茗小譚乞為約譚舟老同過前評宋大家文極為痛快欲續為商確竚望竚望昨校定晦庵先生極其精細已一一改正再以第二冊奉覽幸即賜還理學先生詩晦庵下惟劉靜脩先生極

工已選定繕將完矣寧有近息否承澤頓首  
久未奉教殊切耿耿近養疴西河水次草廬尙約年翁  
小譚也爛麵衒衒有小房一所頗堪居停今年欲葢中  
層不與人住以西向日者言宜明歲敬借光移居不必  
論租前已面言之矣不盡澤頓首

惟老年翁劬勩在公今已及瓜寬大廉淑之譽浹於遠  
邇喜可知也不肖近來閉門益深自年翁行後杳無登  
然之音故懷思倍切非可言喻年華日暮而伊唔之志  
不衰諸經俱有註解現在註儀禮五六月間可卒業苦

長安無經學書承教代爲南中收買此莫大之愛謹開  
一單乞留神重價購之抵都一一奉上使旋匆迫肅此  
代候願言不盡

法方伯若真

老年翁報命榮歸竟不能一尊奉祖道雖淪落中人不  
足齒數其如中心耿耿何弟已戒道矣一札再別不盡  
之緒時縈夢寐附問候小奏九件統希注鑒其別件載  
一單唯老年臺不忍之懷向吾鄉諸君子一致之感德  
何旣肅此代布不盡依依原綾一幀書復

說帖

原任江南安徽等處承宣布政使司法若真說帖伏念  
真待罪兩載拮据萬狀盡爲他人作牛馬若有一分一  
文自私自利天地鬼神鑒誅今離任之後代上憲賠墊  
者已罄變家產尙有一二未完無可再賠不得不據實  
說明仰求郎大人金前司自行歸結然不將事之原委  
說明恐冒欺罔之罪謹一一陳說一郎大人任內發前  
司收寄賣黃豆肆萬餘石至八年回京時勒令變價解  
院復差內丁守取豆價因年久內有耗折並經承侵欺

貳千叁百陸拾柒石該銀壹千壹百捌拾五兩經承陳  
睿無力賠補遍揭通衢有總督豆商之語污鱗不堪只  
得借動庫銀墊解今庫項無補無可代賠者一也一郎  
大人任內積欠倉米貳千柒百陸拾餘石至八年回京  
時差內丁資冊到司諭令改入新收項下候發價銀及  
至回京價仍不給前米缺額只得借動儲米抵完又令  
左書辦取去銀貳千兩銀米俱空今儲米部行變價應  
完米價銀肆千柒百叁拾玖兩零虛懸無着無可代賠  
者二也一金前司任內陸年柒月內自領出庫銀壹萬

捌千餘兩至柒年捌月始買豆壹萬叁千石到省久泊  
河干及詳明奉郎大人憲批收倉在船內卽有霉爛共  
計六千餘石此時若勒買足報收有失同官之雅只得  
允從使經承林植領出易新償補後林植身故家貧不  
能賠補軍需缺額後官卽勒令本司代賠或在金前司  
良心不昧不能不急爲措完者也以上三件皆遠年未  
完並非本司任內之事本司亦並不會出結受代今俱  
累及本司淹滯江南諒亦仁人君子所垂憐者敬陳臺  
電如會郎大人金前司鼎言歸結俾得生還存歿啣結

謹說

趨叩未得晤謝爲懷前見鄭石兄道及老年翁思得秦  
篆弟有一老友頗善此技敬爲製二章呈閱儻可領略  
不妨以所欲者頻爲示下亦知此道之有公好也何如  
何如諸容晤布不盡制弟真百稽

許久未獲晤教何日共移鄭兄處得借高談一日耶爲  
望爲望前委大字倩人勾出其力不能如腕聊以竟數  
耳敬報命制弟真百稽

許久未晤正欲受教昨忽接家報有傷心之痛病不能



支實不能侍長者但肅此代謝非敢言辭也謹叩呈不具弟真頓首

昨趨望大喜未獲晤叩容再領教誨吉聯博笑小弟真頓首

孤旅遠客到忙忙數晝夜無停時以食客起居皆身親之厨下無一使可能了此也適客去得稍息信手作數句媿不能揚揄大雅之十一其若之何幸老年翁裁用之令叔老年臺尙容端肅呈不具先此特報並宥遲遲之罪諸容面悉不盡制弟百稽

別老年翁後卽以謁撫軍作皖城行得之郵筒附忤庭年兄札恐遲其中之說先遣使上聞亦有一札致徐公祖乃爲弟交盤之役祈其破格照拂老年翁見時當爲弟致謝之感徐公祖之恩斯勤斯也並祈老年翁代投之統容歸去時登叩不具制弟百稽首

錢塘雪旅把臂言別儵忽四載其如此光陰何弟以不然之白灰自不入春陽之赤管老年臺先生戛戛斲刀軒軒簪珥而雪中之炭亦覺艱澁江河日下可恠也亦可悲也歎息歎息自弟狼狽歸來頓臥空山炎涼萬狀

辛酸百結欲再走長安一番買老仰二天之在層霄憐  
一介之有知己老年臺先生必有以指我於泥途落落  
中也秋暮漸寒年歲不登脂車無資須之來春可偕長  
兒樗同裝北發趨謁崇階以近奉截取之例先具文投  
貴衙門祈臺鼎曲王之亦以王玉如年兄歸來云前猶  
有軍機十八人無著落後此者更無期徒多往返耳且  
戀戀者樗兒於己未徼幸後卽循廣東例券助援納中  
行等衙門本年十月初卽題冊到戶部因執事金提塘  
苛派抖難至今六年不給庫收以致未行貴衙門近得

龍需老年翁大力轉求又不能不遲遲以待望梅俟有  
頭緒更望臺恩先此長鳴聊申濶緒統希慈鑒自愧空  
函尙俟晤叩不具小弟若真百頓拙畫將意有如晤言  
以當大噓弟真再頓首

李閣學之芳

日承枉顧柯陽得領警欵殊慰飢渴第以簿領塵勞未  
獲一尋青霞仙奕之勝良用闕然山城蕭索仍攜兩卷  
畫圖輕舟翩去在老年翁雖爲韻事使地主將何以爲  
情哉清秋漸爽近社自佳西湖山水間有勝緣否臺旌

東邁當在何時率裁奉候所煩大作及物色諸名人想  
荷留神統祈卽示幸惟垂鑒可勝神往  
鞅掌戎旃屢逢虛度爾然疲役自歎勞生知愛如老年  
翁方當憐惜之不暇而亦爲此稱觴世法乎仰荷殷遙  
佩服曷已承示詩文典贍風華俾弟攘美感何如之諸  
友皆屬名下弟願見有懷已非朝夕希老翁代爲道意  
意湖上勝事如常不無倦游之慨便中容再致之別教  
當俟酌奪另報勿次勒復未盡縷縷  
班師北旋兩省更番駐防夫役艱繁十倍于昔小民竟

無休息之期顧此殘疆殊增浩歎頃接翰教得諗近履  
二三執友半載以來不能爲湖山游屐增色且人情奔  
鶩久已悉其槩矣承諭當爲留意必須來謁而後酌定  
也林生抵衢自是端謹之士餘具悉之率復幸鑒不盡  
前承翰教勿次附復應塵典記班師就道比日近况何  
似二三湖山主人不致寂寂否甚爲念之前書所云林  
生恐江干舟楫維艱今特專人奉迓煩老年翁轉致幸  
卽遄發日有碑版文字數首欲藉面商久已懸榻待之  
矣淳安留代已卽批行率此惟鑒不盡

余閣學國柱

貴役旋後又有兩函未知何時可到造船之說既在外定何衙門此為可以自主但恐船增一事而別累不減須得督疏兩分題明就裡如議自易易也白仲調年兄以海內名宿得屬淵源大為吾道生色迺以眾見參差未得首甲不獨我輩悵快凡屬有心莫不歎惜頃因別有端倪未便遽歸其令郎家居恐有應照拂者在台兄至性關切自毋事不佞豐干耳藉寄不盡  
客春小力南還接手書殊慰遠念不佞沿途阻風雨仲

春始得從廣陵登車以北過家兄滁陽署知台丈有龍江之命冀得中道便晤茲因敝故友王雲川諱子龍藉候起居敝友於先朝為甯南虎將卧龍岡乃其故里滄桑後泛宅投綸與不佞結鄰好廿餘年而食貧特甚此君重意氣輕死生然不曉筆墨不解逢迎台丈當另設一等以待之耳途次如面弗旣

京國聚首凡事正可商量不謂不孝自孽深重遽抱大痛飲血南歸遂易星霜緣抵家之後親友弔問遠近陸續今夏始畢且敝邑又僻處山谷無從一寄聞問門下

雅才練識自是遠到之器但輦轂之地是非易消物力  
維艱慎交游惜日費此其最要耳不孝志氣益敗清華  
絕想邇為先人無歸窆之善地早夜疚心意欲稍遲起  
復以襄此大事未卜可如願否揣此聊當面晤長安風  
景若何有以示我臨楮依依不盡

聞命之始原擬中途可晤不謂馳驅相左又承存注至  
今為念不佞於三月廿四入都此月即可推補銓部雖  
有復例之議然局面濶大頭緒繁雜終成道謀貴差較  
之別推雖有豐儉之殊安穩無虞則勝他處六七八三

月方是良時但滿公極宜調和大約凡事寬一步讓一  
着終得便宜耳分造漕船之說卽與司農商之如有的  
着另當遣報王雲川之札原非得已高明必能體亮目  
下家叔又索有一函奉侯亦不得不應輕重亦在台酌  
實屬親叔自不得與王雲川同眎也同門卷已見孫白  
張萬四兄亦已相晤借光夥矣役旋匆匆率復不及百  
一卒表誠面謝

役還帶有寸復想久入台照造船之舉已行外議但得  
在外酌定之後方從內料理庶有濟也家胞叔諱允明

顏氏家範尺牘卷一  
以從家兄滁陽署便候台範亦通家之誼不可已者昨  
已從別函諄切及之台丈古道入定不待不佞之長言  
矣率奏如面弗既

杜別駕恆燦

周京舊地文獻尙存得老世丈輒跡及之王風大雅倡  
道同人真一時之盛駸駸可千秋者也承教大作洋洋  
多風得初盛遺音且楷法精妙當奉爲奕世之珍矣癭  
杯荷愛莊生謂不材得全弟知懼矣并敬謝教益也何  
日命駕牛頭寺爲十日談弟掃徑以俟矣復顏世兄同

月方是良時但滿公極宜調和大約凡事寬一步讓一  
着終得便宜耳分造漕船之說卽與司農商之如有的  
着另當遣報王雲川之札原非不得已高明必能體亮目  
下家叔又索有一函奉侯亦不得不應輕重亦在台酌  
實屬親叔自不得與王雲川同眎也同門卷已見孫白  
張萬四兄亦已相晤借光夥矣役旋匆匆率復不及百  
一  
役還帶有寸復想久入台照造船之舉已行外議但得  
在外酌定之後方從內料理庶有濟也家胞叔諱允明

顏氏家範尺牘卷一  
以從家兄滁陽署便候台範亦通家之誼不可已者昨  
已從別函諄切及之台丈古道入定不待不佞之長言  
矣率奏如面弗旣

杜別駕恆燦

周京舊地文獻尙存得老世丈軌跡及之王風大雅倡  
道同人真一時之盛駿駿可千秋者也承教大作洋洋  
多風得初盛遺音且楷法精妙當奉爲奕世之珍矣癭  
杯荷愛莊生謂不材得全弟知懼矣并敬謝教益也何  
日命駕牛頭寺爲十日談弟掃徑以俟矣復顏世兄同

胞三原道弟杜恆燦頓首

司左側一小樓頗潔非酒家也弟已攜尊卷在此踟躕  
不敢遠勞至北門矣昨書如抄竟付小力也弟燦再言  
竟日論文又得縱觀奧府會城中如此清爽宜人之事  
未會有也太上感應經乃弟從春月刻成者以紙墨之  
資尙須將伯遂不獲盛爲傳布謹奉一部爲旅舍寓目  
未審可呈覽於先生長者之前命工印施乎刻板見在  
省中印工處矣西果二種并志寸心榮發何日今日尙  
過我耶不一不一弟燦頓首

手教至諷誦再四輒不勝情弟土木形骸久矣不意吾  
兄之能感人一至此耶東發何日慎重加餐努力名德  
與道合真他日弟當長跼下風罄聆提誨得長存於天  
地之中幸矣幸矣刻下渡渭抵三淮攜手河梁遙遙何  
日如何如何邈來道兄世翁弟杜恆燦頓首  
孫舍人枝蔚

昨一友邀飲秦淮舟中至夜方歸歸後因乏使不能復  
至尊寓間有事相商是前所託事否讀大著玩味不忍  
釋手延年庭誥之推家訓後未易多得也特奉還前拙

稿亦望擲下弟枝蔚頓首

拙序於蝟冗中成之苦無佳語又重違台命謹書上病  
人滿床醫不離門聞先生將行竟不及一握別幸惟鑒  
亮修翁先生大人功弟枝蔚頓首

數日因有亡弟之戚匍匐喪間是以遲答尊札悚仄悚  
仄承惠大刻今日始得展誦元氣渾淪體格磅礴求之  
古人當在少陵昌黎之間餘子不能望肩背也敬服敬  
服先此謝教評語一兩日間卽呈上不悉功弟蔚頓首  
應博士撫謙



前承命以行樂贊見屬時無印章又僕人甚小懼有失  
誤不便領歸今作一拙言奉贈聊致其意不敢塗污尊  
卷以取罪戾唯先生一笑置之而已搗謙再頓首脩翁  
先生大人門下

夢思闕里冀一登堂喜邁光儀來蒞此邦遠承世澤用  
行舍藏近徵忠孝守義巖疆居雲霄裏家秦嶽旁已從  
皇極聿建三綱更列人間聊製七襄今瞻之子如愛甘  
棠念昔陋巷克己皇皇豈意雲初百代流芳像贊爲脩  
來先生錢塘弟應搗謙具草

應處士

禮璧  
度璧

敬啟顏先生閣下伏惟先生復聖之象賢斯文之樞斗  
得誦先生所賜樂圃集篇章之際想見其人前奉命家  
君同沈吳二世兄恭叩臺端并附上九容箴拙文四篇  
求政今早同敝友走領適有客在堂閣人難於傳命不  
獲望見顏色悵然空返拙文如蒙先生不棄而賜之教  
乞示期走領敝館在賀衙巷內去尊寓咫尺謹竚立待  
命之至修翁顏先生大人執事年家期晚生應禮璧  
度璧仝  
頓首

吳處士懋謙

余客遊曲阜甚久因得交脩來時脩來弱冠才鋒馳騁  
霆舉颯發便令人退三舍日同其大阮石珍倡酬不啻  
百餘篇暇相與瞻謁孔廟禮器憑弔少昊元公之墟極  
一時友朋歌咏之樂脩來每出語必驚一座余心儀之  
而心憚之贈詩二語有君才方跋扈余意已沉冥然脩  
來靜穆不輕言詩後舉進士權稅龍關復遇於金陵適  
我友愚山至出其南苑扈從詩八首兩人讀之瞠目歎  
賞爽然自失也浸淫有年陶冶成集而見其五古之雅

也七古之雄也五律七律七絕之精以練也沉着痛快  
壯采驚人如隴西之射飲羽沒石平原之書透過紙背  
字字從古人中來而又字字不從古人中來東魯風雅  
代不乏人荔裳淹通阮亭英藻方之脩來之沉鬱偉麗  
真堪鼎足觀止矣雲間吳懋謙序

日來腸紅甚腰痛不可忍不得入城殊為相念當事歸  
否別有事否弟有小影求題像贊俱欲意中人先生文  
章品望為海內第一人不可錯過也上與旁皆可題惟  
尊意脩翁先生教弟謙頓首

來對如魯公透紙背諸咏清新沉着高貴不可言謝教  
謝教兩窓作得分韻二首求政弟酬應頗多前酷韻可  
省矣如何如何樂翁長兄先生教弟謙頓首  
一病杜門幾不能見我故人也同人爲弟危者十且八  
九如此暑天蹣跚簾幕間尙未出戶今幸庇稍進食接  
教知念弟深矣聖湖白雲繚繞清夢諸同人當一一致  
之詢使知遊况頗佳慰快之甚俟秋候駕掃室望早桂  
新開以奉言笑弟一小序會刻否如刻寄幾部來并有  
懷弟詩否脩翁先生小弟謙頓首

吳徵君農祥

張鍾會飲圖呈上恨筆粗疎不稱戴原本耳如可塵雅  
玩留爲鎮宅爲荷謝生老矣乃能爲老先生圖此二冊  
抵掌相對不辯爲三大傅衣冠謝郎邱壑俱兼之矣老  
先生必自有題拂當和其後耳弟祥頓首脩翁老先生  
老年臺

別後又復患瘧台諭以寒暑中爲之恐不足以辱命也  
惟教之小兒吳容謹遣趨侍左右俞敷伯今之史才也  
老先生於鹽院祖臺處乞提攜之外家兄吳楨舍姪吳

紫芝皆寒家之俊也望一體視之爲感弟祥頓首脩翁  
老年臺老先生大人  
小兒昨已奔歸今晨趨柏臺試矣伏冀老先生始終題  
拂不盡布衣弟農祥頓首脩翁老先生吏部相公閣下  
席處士居中

不奉顏色者已屢易星霜矣仰企之私如何可云憶先  
生憇駕廣陵猥蒙雲誼不棄葑菲收之交遊之中廁之  
座席之末且辱玉趾惠然肯臨蓬蓽於是得共啣卮酒  
細叨塵論酣醉耳熱復爲刻燭聯吟而高岑妙句尙勒

齋閣則一時叨藉之盛迫將感思無盡念之念之先生  
巍然人表如岱華聳拔環區爲時瞻仰而銓選重寄俾  
門墻桃李宏列仕版至若揚風屹雅牛耳詞壇更爲人  
士之宗拙選一帙亦藉光珠玉不小近將馬首都門當  
挾此帙敬呈因以奉教於左右則數年積懷遂可少慰  
也春水游鱗便附尺素兼以蕪句寫意統爲寄正唯祈  
藜照不吝則遠人幸甚幸甚

雨雪載途未得衝泥造晤深爲悵歎小照鄙陋無似欲  
藉大言爲寵錫妄干珠玉或不吝揮毫耳拙刻將卒業

欲求佳稿爲陽春高唱以光梨棗幸卽簡惠是望外有  
俚句奉贈容錄呈不一脩翁先生制晚居中稽首

林處士璐

契濶登龍於今四載伏處蓬蒿鬚髯如雪南來仕宦每  
問璐姓名皆出先生之口知提攜教誨感深刺骨向拙  
刻另刪定付梓未成會許弁言謬托椽筆故人貧病不  
能遠涉倘有青眼處還祈留神拙稿一册奉覽

早閒齋稿呈政欲面求教益再行改削耳憶前諭訕歌  
戲擬爲之或不須此恐涉自獻之醜詰朝當晉謁以悉

種種晚林璐頓首上

拙作二首欲走謁呈教適有遠客枉顧先送記室野老  
嚙語不足道也俟膳清再行刪改可耳昨懇元晏爲拙  
刻生色先生能恕然乎太翁傳叨列賤名何敢損刻資  
容面悉謝晚璐頓首

昨醉後狂言得無持布鼓過雷門乎太老先生傳乞發  
來手當補作贊三日內并關侯祠記同奉上小序一首  
求附末簡稍暇當更作大篇刻入拙稿以榮布衣何如  
何如晚林璐頓首顏老先生山斗

杜處士濬

前拜台復深感盛懷而其人忽然數日不見自失機會殊爲可駭豈弟之窮固未易瘳耶茲敢奉問先生門下不識有可以爲弟地者而弟但附一書寄候當事用成兩先生之美則尤奇感也第恐遲則遲矣悚切悚切連以酷暑不敢作熱客俟雨後少涼卽趨領至教也不盡欲言

吳太守綺

塵事蝟毛畧無清晷不遑造別堦下豈勝歉仄昨以薄

物將意不蒙全茹反辱獎謝真足負愧矣茲有商者吳門做居二所業着小价求售其價值必待數日後方有就緒綺則不能久候欲先就道柰刻下脂車乏費敢於老先生處暫假拾金濟此匆遽之需當於渡江後卽部署奉還素沐高雅必不以鄙言爲河漢者迺敢瀆之左右幸諒鑒不盡翫縷臨穎主臣

弟已遷至曾氏河亭矣刻下正在部署未及過晤當事一札前蒙俯允但小兒卽日南歸其事俱在邗上必得持返相示乃得拜惠也望爲轉達特此瀆修翁老年翁

先生弟綺頓首

連日避囂於清涼山寺月中望遠頗多清興恨不得老  
先生同知也今日水樓聽雨始得從事筆墨冀報台命  
耳田公祖將返句曲前事可否幸鼎言以促之爲感修  
老老寅年臺侍綺頓首

吳會萍逢正擬飽聆塵誨而匆匆返棹不及具杯酒以  
敘別懷又不敢俗物唐突高雅惟案頭小玩數事謹貢  
之清悶閣中聊資吟餘真賞伏冀晒存豈勝榮藉不一  
綺再頓首

適所言書院一事非有他意以田公祖當世大賢不可  
失此勝地資無多費事可必傳幸老先生商其可否以  
示援納旣不可行今奉一呈相換餘兩事並祈代促卽  
發爲感修老老寅年臺侍綺頓首

姜處士梗

連日走候面謝皆以公出不值爲悵蒙賜瑤篇并厚惠  
種種感佩非筆舌能聲明早的行矣以措置行李之艱  
心緒惡極竟不能上和白雪以表數年仰企之私歉仄  
無似希知己原而宥之梗頓首頓首

渡江匆遽不得走謁行館爲罪衢州之往想不宜太遲也昔李青蓮曰鑑湖五月涼又云竹色谿下綠荷花鏡裡香則知山陰道雲門寺或可一枉高人避暑也像贊卽當草奏決不煩苞茅之討王父母下車卽詢及賤子姓氏此爲徐崑山昆季所託耳然亦不敢卽爲趨拜者以老先生龍門在望梗忝有一日御車之幸必須長者表揚介紹而疲駑下乘亦可登騏驎上樞矣昔縣官負米立雪拜袁生僵臥之床陶公伸足度履屈刺史載酒之期使當時莫有後先必不能成古今佳話故特遣豚

兒渡江求一尊札致之王父母或可少冀其青盼則玉成之德真不淺細也札中求謬爲稱許云梗平日不能奔走趨承當事貴人卽冠蓋滿京華交遊遍天下而云梗倦遊已唯貴人能式廬圖面耳前書單內尙失開名臣奏議一書係一百本此最要者大約弟在敝鄉先爲搜訪諸書名單別肅

吳興陸氏造筆名手聞台駕至越彼欲以佳筆貢之法書藉弟一言爲介希選其可者若入京需用亦不妨向渠多買連日以諸公盛筵故不敢唐突竢清暇當走訂



看畫至田家一飯也梗頓首頓首

吳門

宋實頴

既庭任王府基

張適

字崔民任專諸巷詩畫彈琴為江浙第一

金侃

字亦陶住雙林

卷詩文

余懷

字澹心金陵人

姚文焱

字彥昭長洲縣廣

畫妙絕

楊无咎

字震百詩文妙絕住

王暈

字暈石

人禍門

高簡

字澹游閩門內李子靜姻家

馬長逸

住羊

谷畫為三

徐枋

字昭法明壬午孝廉高士詩文畫皆妙海內著名

以上諸公凡相見俱云姜梗鐵夫致意

盧博士元昌

小詩三首奉正大作幸即擲教外有小事相瀆乞一札

致婁父母并煩尊紀懇懇得重懲為妙修翁先生小弟

元昌頓首

昨特走候值駕山行想佳詠必多矣弟欲求一尊帖致

史公祈發小伴荷荷恃愛干瀆容踵頌不盡修翁老先

生小弟昌頓首

紀處士映鍾

讀樂圃集知作者為一代之詩人也開卷多樂府古詩

峭然壁立吐語高潔已坐百尺樓上酒酣睨八極俗物

都茫茫矣至於命題有意憶古情長感物悲歌一倡三

歎古體之渾灑流轉今體之秀逸絕塵含情深厚讀罷  
而几篋間尚殷殷留金石聲安得不以此事相歸顏先  
生樂圃集題辭金陵紀映鍾頓首具

丁郎中澎

昔人稱孔北海爲先達而其文特高雄德祖次之詩皆  
不與也詩獨推子建正平甚矣詩之難言已從來論詩  
家侈口以古風方漢魏近體追盛唐然終屬描頭畫角  
愈趨愈下造建安慶歷之堂奧者寥寥若晨星焉余且  
老懶作詩間作亦未必佳嘗欲得海內雄材沉博偉麗

獨踞一代之上竟不少槩見讀樂圃集不得不於先生  
歎服膺也樂圃集詩評弟丁澎藥園僭筆

張處士彥之

鴛湖王書城兄精於星學與苧庵宏軒梅巖俱舊交仰  
重老先生令範特過奉謁公祖父母間一嘯揚之彼叨  
庇不淺矣修翁老先生大人年家眷晚弟張彥之拜  
范進士鄙鼎

老年翁文章聲氣夙甲海內弟於蓬窻間作南豐北面  
者旣十年於茲未之役喜依未光得慰饑渴未幾匆匆

言別夜明總欲滿把擲而不才者當面錯過可柰何頃  
見老年翁讀書鳳閣稽古龍墀此一佛六押昔人所深  
賀也宰相判官真不愧王佐家風矣每欲相羊左右以  
道阻且長適因家兄出遊聖鄉敬此代候起居附小刻  
求郢不戢

王給諫曰高

睽違教範再易寒暑雲樹之思時切寤寐老年臺以清  
班之選暫膺樞關重任聊展經濟鴻猷此乃踐台宅揆  
之先資也欣企欣仰迂拙如弟自給假歸里久戀山林

未獲通候茲將入都候補特令小伴隨賀年兄南來托  
代叩新社不腆附將聊申輶悃惟冀鑒涵小刻奉覽臨

穎神馳

史編脩鶴齡

分袂倏已半載秋光清勝想龍江煙月盡入詩囊殊不  
苦於韻地作勞人也頃接手教深荷遠注停雲相望正  
有同懷耳使旋匆匆藉復餘情莫旣唯鑒不宣

吳太傅正治

祥琴在御景福維新屈指還朝掃榻以俟乃接手言尙

稽良晤可勝悵惘然金風薦爽履坦非遙握手燕山仍  
依依在旦晚間也望切望切不肖年復一年總無善狀  
惟是湖南底定做鄉已稱甯宇六十老人可以伸長林  
豐草之計統俟知已到日悉此衷曲耳遽使言旋草此  
率承復不盡願言臨風瞻企  
屠尙書粹忠

別來迭更燧火雲樹之瞻時勤寤寐也老年臺鴻才偉  
望爲當宁倚重邇聞靜攝舉朝引領未審何時命駕以  
慰蒼生也家叔事顛未已悉左右不敢多贅但積弱之

後無能驥振大急小絕所由來耳承老年臺加意栽培  
雖弗克如願而愚叔姪啣銘甯有旣哉亦惟有調和一  
法作就地文章庶直捷了當而已不盡縷情容圖端佈  
揮汗率復神與楮馳

李處士日景

弟於前月二十九日渡江直至本月初三日始得長發  
曾留數行令小奴投上不識入清覽否弟自初十日抵  
濠上一路爲風寒所中舊恙復作臥牀又三二日地不  
過三百里別不滿半月回望耿光宛然天際當不知如

何之久且遠也弟由都下方回里門返掉江甯想又是報命之候龍江月色渡口濤聲不識擎杯摘韻時亦念及白首李郎悠悠行路否也豚子寄寓江干異鄉孤旅所謂窮人無告是也爲祈老親翁曲加青拂深感長厚病廢餘生一日不填溝壑決不敢負高誼於雲烟耳料老親翁兄臺軫念梓里必不忍膜置也聞有觀風之舉此江南諸士子之幸所託陳奮飛楊芝二生并童子陳玉書者萬望推分優列榮感不啻弟身之矣承惠詹父母一函到卽致之極承深款弟已將太翁任鳳陽縣事

言之渠忻然樂從卽新守劉親翁弟亦力託亦爲唯唯老長兄幸速令人來學中遞呈以副至孝行迫率勒諸維心照臨池不盡縷縷長至後五日弟景再頓首弟廿二日確行矣昨匆匆走別未盡所談來春返京想又是老親翁報命時也人生非糜鹿何能久相守洵夫所請教之札不識便於相託否侍教數日確拙之性或老親翁所稔知非敢借一字作山水遊人態倘蒙酌發亦桑梓厚道也卷冊三件係王生求售者送覽尙有畫屏二十幅容過小寓取看向拙稿便中查擲諸不及弟

景頓首

昨匆匆以小力四出簡駕爲悵惠函領到存之笥中相機投之若可不煩當事也仍當郵寄然老親翁舌上蓮花已鏤肝刻骨矣佳箋拜領快甚隴蜀之求爾爾一笑一笑中書君適值乏用更感分惠多矣昨所云寫字之王生曾於江甯管糧二處以他事夾責擬罪恐老親翁不知其來歷特密聞之如欲令寫楷字差貴役送之寫去相接恐不便也分俸極感至愛第尊署清寒祇有心領而已今日尙有一席他出若天雨則不能渡江又在

明早矣率謝不一弟景再頓首

趙太常崙

昨緣便鴻附上八行想已達吾年兄台電矣賤恙至今尙未全復皆以人情之薄所遇之窮鬱鬱使然趙如松甚可用遣价去年兄與周年兄望石商行知年兄骨肉關情不待多贅去价口稟可耳別我年兄不覺半載弟卽年兄勿須再囑也六月出都炎暑馳驅一路感瘧症直抵三山未愈昏瞶中扶掖入闈幸仗庇所拔皆孤寒知名士撤棘之日歡動城市捫

心自慰庶不負我兄知己之望耳卷隨後卽到弟尙有  
小价去諸可心照不贅趙如松甚的當孔老親臺推吾  
兄之愛不啻骨肉謹此并聞同署諸兄弟隨後卽有人  
到年兄且勿道及可耳此番文頗堪觀年兄須亟力譽  
揚之

鄭山人簠

皖邸餘閒屢得罄聆塵教生平至願何樂如之春歸過  
尊寓握別冒雨尋山二日始抵浮渡山不甚高而巖洞  
萃集徑不甚深而松篁陰翳有關有廓有橋有牖皆是

天然不假人力週遭不過十里而邱壑無盡茲山僻在  
荒陬游人罕至宋歐陽公往訪山僧遠公者山自茲始  
闢焉山徑有三道由華嚴寺入勝始得綱領寺僧號山  
足者乃青原首座瀟洒有致脫堂頭習氣凡入山俾之  
爲導極佳老先生掛瓢江上時由王家套不過半程可  
到幸勿以紆道失之晚簠敢勸駕顧前出山由陸路至  
廬州三月廿六始得歸里不意金斗程蕉六先生亟欲  
晚簠相會遣价追至江甯簠因其誠懇不能固却今將  
復往矣前領老先生諭帖已付記室矣今因盛使來皖

便鴻附候容面不既臨穎曷任瞻馳  
翁尙書叔元

春明拜別寒暑再更鹿鹿塵空中遂成疏節然瞻戀之  
私無時不依座右也叔元本無識知奉命來此畏懼  
滋甚出闈後擬遣一介祇候興居逡巡未果乃辱老師  
叔手書慰詢兼荷隆貺遠頒慚感何極貴鄉人文之盛  
實甲天下前列諸篇自謂得未曾有榜發後會城諸當  
事皆承謬許謂輿口翕然但不知都門議論若何大約  
兢兢此心可告天地餘非所惜惟才短識薄或有遺珠

無所逃罪也老師叔一代鉅人衆望咸屬幸不惜齒芬  
獎借曲賜包荒則感頌名德永啣不朽矣盛惠對使敬  
璧率泐謝復統希垂照不一

老師叔大作近今以來都無此種手筆不朽盛事舍此  
誰屬續示十三篇方焚香盥讀少寬四五日便當奉繳  
承諭序言實不能繪畫日月或有思路可尋當勉綴數  
語不敢必也先此復不次世侍生叔元頓首

高太常層雲

曩者素車東指相對霑衣惻愴離情較尋常分袂爲更



切也歲華荏苒兩更寒煥想老世叔先生松窓讀禮著  
述尤多且知牙緝卽吉不日還朝肅迓前旌竚傾積愫  
其欣慰爲何如耶世晚鹿鹿無成旅懷蕭寂前雖濫登  
薦牘正恐素無根柢之容未敢妄邀非分近復議開史  
館則朝夕從事不幾束細腰乎大抵隨行一爲與試以  
了此一局已耳別諭自當爲知己者效想譽望夙欽有  
無藉於鄙言者矣使旋藉復不盡依馳

潞河猶几席間耳馬首一去邈若山川神溯雲亭倍深  
勞結昨偶至闕下爲俗緣所困片晷不得自由乘間欲

一覲清揚乃竟未能適願旋爲敝東促歸遂不復走晤  
殊怏怏也二箋奉繳冗中捉管拙過巴人如何如何二  
老先生所叱名荷荷晚層雲頓首

梁相國清標

久未得相晤爲悵舍親郝雪海前遇恩應得封典聞在  
貴署其公子欲領取舍親雖經身後處分原非侵欺及  
貪墨之比近又經 特旨褒其廉潔准免追銀或仍當  
領幸惟留意如有應商亦爲酌議確當何如餘晤悉  
頃舍甥極荷雅誼謝謝向有舊聯二三皆蛟門諸兄書

者今煩大筆撥冗書之或另有新製亦可又內弟王子諒以太常典簿新納主政庭中亦求惠一聯隨意書賜妻弟感佩無極併望早命筆不一  
昨屠兄來晤翩翩佳士不媿門牆可喜也解蘭石大破積習爲近年學使所僅見闈前不能考完時也勢也督疏請展期亦無可如何之計幸年兄主持使竟其局造福士風甚大且足爲各省學使之勸雖與定例不符但今日破例之舉亦不少矣似不必膠執成說也何如何如解子家兄之及門然亦公論非私情并望轉致意勞

年兄切切

家弟荷令兄年翁之知佩曷可喻茲又有鄉試做同年金巖者令江右之南豐丁憂已久任內經手未結羈留至今始歸服闋起文赴補其遲延之由文中已詳恐貴衙門或有苛求望門下主持其人貧窘病困沿途持鉢始能北來不能飽胥役之欲明矣所恃仁人能原其苦情也不盡

駱電庵尙滯江都聞經手無甚葛藤而新令不接交代向不佞曾面言之未審何以留難至今昨有字來求門

下草數行致之旦夕卽有公車者南回望付一札來切  
囑其早令電庵歸里亦仁人孝子錫類之義也餘不一  
一  
睽隔兩經寒暑停雲之誦曷能已已遠煩注念寄以德  
音知苦廬平善慰懷可言又見書法益進酷似趙承旨  
尤覘門下里居勤於學問也轉瞬卽吉佇俟握手至見  
示家傳志銘讀之忻慕如覩尊公年翁風烈矣扶溝上  
蔡二令前已面致撫軍草草附復併謝不宣  
歲月不停別遂三載令弟及使者兩寓手書適值不佞

有炊白之悲福過災生熒熒孑影衰遲遭此殊難爲情  
致未及與令弟年兄一敘情好至今忽忽未能釋也幸  
聞卽吉非遙握手可待但迂疎如不佞或旦晚拂衣又  
阻良晤未可知耳吳越之遊此時亦頗不易吳撫吳集  
已草兩函寄上吳藩昨已有先之者越撫因舍姪在其  
部下屢有相煩不便又瀆統惟心亮承示詩集甚慰渴  
思近體尤望惠教哀冗中草草不盡願無辱雅贖併謝  
十餘年來三經悼逝卽奉倩安仁無此慘酷也自傷命  
薄聽之彼蒼若太上忘情未能幾及煩門下手唁篤致

佩之五中屈指鋒車脂轄有期何復以足疾少稽幸善  
攝早瘳卽圖就道可耳扶溝不善作吏中州人皆知之  
今未審誣控何事問來使答以不知王子厚云此事已  
久然究竟茫然奈何容另思所以致之恐不能終保無  
虞也臨筆馳切

僕迂疎無似謬躋崇班十餘年兢兢自謹恐負先帝  
之知而才術短淺無善可稱積罪叢愆宜膺譴罰歸里  
之日荷諸兄古處之誼榮施道左戀戀逐臣伏處田間  
已將一載未嘗不服膺高雅也前聞選入中秘深爲忻

躍此席在今日稱仕宦捷徑所至正不可量惟門下勉  
之耳此賀僕固陋不文拙集實爲災木近已置筆墨高  
閣矣門下之才可並驅歷下白雪樓當不專有千古望  
示新篇以破山中岑寂切切不盡

里門三歲時念故人道阻且長停雲曷已中秋後勉驅  
入都一拜闕廷前度劉郎觀桃如舊而自顧年屆始衰  
顛毛種種憂患之後智慮摧頽雖逐鷓行已不堪世用  
矣京邸冰霜仍如羅雀幸及門數子每相過從獨門下  
遠隔江關唯頻晤仲調白年兄一談運定如面對耳茲

辱翰教具悉雅注金陵有濮仲謙善製小竹器爲文房  
佳玩其人已死其器尙有存者又見近人製小竹酒杯  
亦雅望留意各爲購數種亦齋中譚讌之助也草復不  
及縷縷

嚴侍郎沆

別來忽忽遂已月餘離索之日倍覺其長入夢之途彌  
增其遠頃奉手教忻慰均之訊來役知道履佳勝乍晴  
天氣興趣更多僕一署蕭然喜無塵事儘可讀書所恨  
精已銷亡惛惛不記整日埋頭都無所得可爲知己告

耳來人述諭日內正在胸次逞來計非楮墨可達初十  
後當一入都門共計之率復不盡欲言

自到潞河整日與藥裏爲緣偶一入都卽困憊而返未  
圖良晤深切惓惓茲有啟者鄉試做同門之子遭家多  
故流離不堪今幸貢入成均教習已滿得考一正印則  
其一家尙有苟延殘喘之望僕生死關情不得不爲呼  
助於知己伏望俯鑒微忱不同泛託并非不肖私心上  
累清聽特爲垂憐而援引之感且不朽倘在同人案頭  
亦祈特爲轉致賤體小瘥卽圖泥首伏枕草不盡欲言

北地早寒秋風加冽適館未謀禦冬何計言念旅次不  
勝怍怍祇疎濶爲惓切也新詩高渾蕭穆真得黃初以  
前風旨近時作者拾人牙慧便付棗梨而宗盟風雅未  
布國門亦詞場憾事也故以薄俸爲倡望早授劄用  
慰同人至切至切弟沉頓首  
勞副都之辨

分袂忽幾三閱月矣想念之私與日俱積老年兄近况  
必倍獲清勝弟迂拙性成別後絕無佳狀唯存一矢公  
矢慎之心無慚屋漏而闔中任勞任怨種種非筆所能

盡檄棘後地方諸公因王師移鎮奔命不遑視吾輩一  
差真屬贅旒卽往例又格於廣文諸公靜候匝月稍有  
成緒然幾減半矣弟刻下暫返里門抵都之期當在仲  
冬先令小价輩於諸先生處稍展寸私百凡望年兄鼎  
力一概包荒感何如之但小刻攜帶爲艱已會一肆中  
恐一時未能入手并祈婉言先爲道意劉潛老處亦有  
小札致之矣前所委尊函已面交蘭老但此君未知何  
以作報章也端此佈懇臨楮瞻切  
葭灰應律絲線添長正老年兄新社方升時也憶初夏

奉擾佳園快領塵教轉盼又逾數月弟每思捉筆苦吟  
爲杏壇別圃作一首唱但邱壑烟霞弟亦有此錮癖見  
老年兄金昆玉友獨享此清福不覺夢寐神遊第恐風  
塵鞅掌之餘率筆了此公案反令泉石笑人故逡巡藏  
拙耳刻下三年之局弟已報竣雖當事者亦有雅意但  
弟從來時命自安且捫心亦無善狀承知己注念亦惟  
有中心藏之而已奉祀三詳俱已如命迅發想簪花釋  
奠可不誤佳期也試牘全集係弟三年心血所存秋闈  
獲雋者大率前列居多謹以一冊奉政又一冊乞致令

兄老先生均望有以教之承惠多儀謹登一種使旋附  
謝不盡瞻戀

承乏三年備承教益匆匆南發離情別緒楮墨難宣至  
弟守拙才疎當事之知己屬過分何敢萌一毫妄念耶  
承諭祠生謹如命頂補諸生衣頂近奉部文通行嚴飭  
新歲總未批發既承來教諄切當留至交代前商所以  
報命也台愛重叠附謝不盡

董尙書訥

拜別時過承至誼肫篤感深五內雖身居天末無刻不

神馳左右也弟冒暑長征曉夜馳驅所過崇山峻嶺皆  
人烟稀少行路維艱詎意抵滇人情大變皆外柔內險  
落落難合藩王既不照拂地方毫無情意蕭條萬狀去  
國懷鄉不敢爲年兄盡陳恐增年兄之遠念也弟仰年  
兄爲泰山北斗望於格外周全弟不敢忘大德也不腆  
將意托孫太夫子致上幸賜涵納爲禱別諭已多方求  
之矣滇南無可取者先托人於湖廣覓之料自得當必  
不負委也諸夫子及諸同人前皆不敢空函致候愧悚  
無地年兄晤時亦不必言小力之人也都也敬候近祉不

盡神馳

別後忽忽居諸星霜兩易每憶向時共商風雅握手相  
過何可得也邇來長安寓邸景况蕭屑竿牘久疎乃辱  
瑤華先及知年兄近履安和讀禮席苦孝聲洋溢式於  
井里傳諸京國何快如之青芻絮酒方以未得趨叩爲  
歉復蒙齒謝益增媿汗矣天氣炎蒸尙惟節哀強飮以  
膺景祉臨風裁候曷任翹依表傳領訖并謝  
喬侍讀萊

同年同官又復同志四載長安樂數晨夕真極友朋之



盛事至於雲誼種種感入心脾雖襍被南歸而依戀左右實未去懷外日遽使遄歸有失修候不安之極至今猶耿耿也弟歸里數載蹇遭橫逆疾病連年又值先君大故不但形神皆瘁亦且逋負如山非故我矣奈之何哉以至一切疎濶雖至好如年兄亦未得一申積悃真無復人理者矣近知年兄亦讀禮東山理合匍匐奉唁乃以縮地無法不能如願罪歎何似祭章引意惟鑒宥之刻下聞舍姪自孟縣歸取道東平遂爾被盜亦不幸之極矣而當事者反以打詐爲辭希圖諱盜真亦無良

之極矣青天白日之下稍有人心者忍爲此乎幸賴年兄力主公道加意照拂弟可恃以無憂而高厚之愛銘之五中沒齒不忘也竭力奉謝但此事已至於此贓物未可必得不如捨之但得脫然速歸則佩台愛更深矣一切皆恃福庇非筆所能盡也臨池北望神與俱遄恭候孝履禱年眷弟喬萊拜

骨肉兄弟離羣七年饑渴之思如何可言屈指今秋定當聚首長安而東山絲竹何久戀耶遠接手教深感注存弟以謏陋濫叨曠典所惜者升六不與題薦蛟門薦

而不試椒峯試而不得若子綸則可得可不得無甚關係矣年兄山居多暇著作益富何不賜教一二曩日升六言年兄欲索同人詩扇敬以五扇奉寄拙刻附覽近以試事勉力學賦尙有賦稿數十篇目下授梓容另請教銓曹日新月異深望年兄主持幸蚤至爲快令兄老先生何日可到近有論俸之說似亦不宜遲遲也鄙子柳已從水路而來尙未到也使旋匆匆奉復不盡欲陳臨池依依  
何中書覲

不奉教言忽更四載濶別之衷與時俱積拜承手札如映玉山兼惠鴻篇及篁上新作齋盟三復煩襟頓滌殊倍於空青在握豁我病眸也訊使者知年兄卽吉以來道履嘉勝日與竹林棣萼怡怡一堂自多樂事淹蹇如弟杜門數載苦狀百端不意中復遘牙角近雖彼愴悔禍甘爲輸服而結局尙不知何如亦亟思赴補但資斧不充未有定期我年兄榮補在卽不審能勉力爲尾附否耳近稿書便面請教非敢以燕石而酬隋珠亦用以誌別緒也盛价事悉之其人口中佳箋如命復上但段

友久患癱症不能捉筆殊爲圯事如何如何四年伯大年兄不及專函統希叱致弟觀頓首

遠承年兄及諸年兄遣奠榮被歿存鏤刻之私百喙莫悉也仲夏過珂里假榻高齋日侍年伯杖履並領四年伯暨大年兄提誨誠勝十年面壁每道及年兄分香帝座不啻天上人若弟泥首風塵前途若漆正不知稅駕何所耳癸卯拙卷久以飽蠹承諭勉索一冊呈上畫稿皆爲覆瓿之用不知尙有存者否喪次不暇搜括容過此檢出馳獻也貴長班至以荒僻故殊深轄褻統希鑒

原舍弟囑筆致候興居並謝存注餘情縷縷尙容嗣布不盡鳳凰池上定多佳什便中寄示一二爲望

孫少司馬光祀

朱嵩老鄉賢客到此朝野之所推重年兄之所熟悉者乞鼎語轉懇劉潛老年翁賜之仁拂想自樂成其美不佞仍當親趨鳴謝也草此奉瀆諸容晤頌不一光祀頓首

山公缺速皆出年兄妙用大爲快報但無人乎選司之側恐無留心催促者今早啟奏又未見漢官想年兄必

當尋常事託之乞再代致鄙意一囑求其早早移詢則  
佳甚矣餘晤悉不一光祀頓首  
敬問錦囊想大佳矣今有商者此時正甫澹菴俸在  
第一第二可得之於最早報滿者昨淡菴來說乞年兄  
卽作一字與楊公祖只云早早報滿最便宜在十一月初  
旬投冊稍遲無妨據貴衙門定例而言自可信從不必  
言及正與澹之說可也倘得今晚賜下與澹一看再交  
提塘爲便此澹所懇求而深感者也候候  
自違教益忽已年餘不佞此中忘年之友茲重諫臣而

外間無其人每有緩急欲商憤懣欲語環顧四旁無由  
可道胸臆間事睠懷年兄不能不增離索之感也不佞  
客春以宦量已盈時局中無着足處冀欲息踪田里引  
例言歸而獲上未能徒滋罪過今惟隨俗偃仰耐此容  
容然而桂珠之呼時復相累公私之際况味不佳計年  
兄明年春夏之交便當脂車入春明庶藉以浣慰積渴  
言念爲勞蓋跂予望之矣大雛倖售皆叨大庇遠承佳  
貺感何可言敬此言謝兼候孝履捧翫手翰書法更覺  
精進秀逸之中結構森嚴點畫有姿正側有勢造微入

妙可以名家矣珍服珍服草此布衷不盡欲吐其已復  
令兄者茲不復道以當言者不必再及也諸惟心照真  
切真切光祀頓首

去歲承特使遠涉重以腆貺金石至誼感佩弗諉念年  
兄卽吉在近日望車騎早入京華計夏間可炙光霽忽  
接手教藹若晤言詢令兄年兄得知近履爲之浣慰若  
南遊亦事之可行者但入都亦似不可太緩近日人情  
涼薄時勢又復不易恐往返三五月內未必能盡遊興  
惟年兄酌之吾鄉苦逢稔歲今遣大臣賑濟恐又多一

番支應未必有救于饑荒聞雪後糧價頓減或民心可  
以少安耶命草三札奈兩轄俱無交誼一函寄之俟升  
亦不足爲年兄重也匆次奉復兼候闔府納福并祈轉  
致大年兄及令叔年兄道馳切之意盱惟心鑒臨啟惓  
惓光祀頓首

日來切望年兄至京冀得良晤慰同心互相依倚之私  
今聞脂車未果悵歎殆不可言想業已轉假自當有數  
月之留明春北上似無容再計也今省中上編檢較俸  
疏此翁寶林倡率博學所爲令兄世兄不知前俸多少

如早到尙可在博學之前若來緩則坐讓三四十人如  
之何其可也今年吾鄉阨運海眉龍河同時被斥不但  
齊魯無色抑且正人短氣不佞區區老憊其僅存者幸  
耳歸去無策此中又落落孤立資斧之計亦日漸衰減  
正維知己指示商確以破岑寂卽煩轉致令兄當命駕  
過來也駿聲已請告此時卧雲在彼不佞卽當於家函  
中囑其訂交想到時必肯照拂度不減於駿升也扶溝  
尙不知其事容寄懇子濂可耳拙書附笑笑草草布復并  
候福履統惟心照馳切馳切

別後忽近一月輒有離索之思世兄入佳勝之地想更  
添許多興會即貴門人遂作榜眼舉朝羨其丰姿真爲  
可喜若非有人稍梗其間已爲狀頭矣順羽奉聞并候  
新祉法黃老先生吾省大賢可以言交其餘同鄉之爲  
監司者未可輕語肝膽也有一帖欲寄楊鄂州彼到任  
聞在四月初十煩世兄早覓便羽寄之再作一札更妙  
廖含章忠厚有餘罹此無辜殊爲可憐偶念及之故以  
爲此爲意外之道地不必令含章知也馳切馳切光祀  
頓首

世兄榮發後計日抵珂里循定省稱家庭之慶計日抵金陵攬雨花秦淮之勝甚爲此行稱羨然風晨月夕同人離索之感亦不能不繫於中也晤行清徐公祖想歡然慰故舊之思法黃石先生已謝事料情況寂寥不知交代有甚葛藤否甚爲念之世兄早晚相見時爲不佞道意貴門人爲學山年兄讀卷同心共讚遂得大物誠爲可喜張兄亦三立卷頭雖諸君所核故稍後之然而亦不低也此中事亦平平艾長老及做師同入少宰澹餘爲陪亦增吾鄉氣色然忌之者多矣貴房卷已見惠

四部謝謝銅事宜商確至妥一則滿公情愿一則衙役不爭然後可行如欲行之先期寄信以便預籌可託之人也購訪厨役夫婦更急於了惟留神爲感晤做館師馬夫子其意何如不佞字中微有所言而語不甚明知解否昨季滄韋召對又肆雌黃亦不知其聞之否也附懇江宜有一守備鄭建功係一表姪昨見報被參恐無一相識之人乞稍稍照拂倘得稍輕感勒無量馳切馳切光頓具

昨貴班役之南付數行候興居距此數日不會記號今

尊扎有號甚便也所云先一字尙未之見榮任之後當與滿洲意氣相合而又當使之有一種敬服之意而御衙役則更當使視之與滿不同於正大中寓精詳不能欺蔽則關務易辦政譽益翔矣何如何如銅斤事使舍親畧買大約亦得八分此係偶收不知將來買成否故不敢多買也藩臺回信不多却無清數不會復問諉有確示始敢實布置耳寶源尙未停仍有此意但終無確說耳徐公祖留意可感意者其在冬間乎彼州而此欵亦望世兄之留意也兩口厨亦求留意貴宗家報卽日

送去矣如晤督不爲密語則已若欲問在上前萋菲之人則滄葦者是彼昨又言一次所揚者淮帥蘇馬而抑者吾師不可不防也如不密問則不必言滿性多疑恐反爲無益矣一切事宜統候手教遵行馳切馳切光祀頓首

前貴班役及差上回音想久入清覽得貴宗處送到手教藹如面語慰慰所謂稅尙未多此中詢之知者云四月至十月乃盛時也龍江造漕之說昨問高弗若少司空尙不知其事亦未別查近有兩次字問施東老迄未



同示銅斤清數昨其令郎見拜云卽有亦不多也金陵  
江山秀麗可助詩情佳咏必多可擇其最關風物者相  
示乎西清諸君近况平安已致世兄相念之意惟內升  
不果行而鄴老又新與相公爲大敵勝負殊不可必將  
來諸君日在其耳目之前是以難處之局岷瞻兄在鼎  
甲中聲譽甚佳又甚篤淵源之義皆推台分誠函丈下  
高座也想間中尙有臨池工夫楷法已精者不宜間斷  
似漸宜肆力行草訪問佳帖不妨多購也草草奉復再  
候近祉馳切不一光祀頓首

月餘無往來之信懷思甚爲馳結得一手書欣如對語  
偶恙而愈定復大健計此時來商鱗集公務之暇領畧  
鍾山淮水之勝賦詩紀事誠足樂也徐公祖至誠君子  
知其必爲留神所煩婢厨二者均不可少厨有婦始爲  
可久良是不妨緩之總是世兄還京時帶至爲便耳允  
老爲人無情大不可交蘆蕉謫甚亦不可與深言且不  
宜以脫畧取忌也鄭弁之弟既知吾輩之厚恐急難中  
有稟相通宜諭令勿然形迹不可不慎相機暗中一爲  
之足矣買銅無多本僅發二百金篋來竟在八分二三

釐間不知購者虛實若何且其中康熙錢甚多除此餘錢無幾可奈之何若鎔之則其工其地又費商確東藩存銅不及萬觔其餘皆辦買之數恐將來衙役怨不經手於交局時通同駁勒俱應預爲籌度者水脚尙未知所需若干此已買之銅乃京內外價尙未試吾鄉貴賤大約不佞自揣力量可任三四萬觔多則不能其買銅批文最要所託者非一路須各付一張始不虞盤詰耳近貴宗藩伯先施投交其人經濟才也草復兼候近祉馳切馳切光頓首

孫少司馬光祀

買銅之信前已寄去記係前月想此時將到也寓京數年始得循補非補後則不能謀退局故爾痴等若此不知者以爲難退易進之小人矣言之可發一笑承遠貺感謝感謝銅限定報滿後兩月全完立法甚嚴今鄭澹菴被參正在此講說甚苦京內外全無採買處昨汪荅文已完連脚價遂費至每觔一錢亦係自買覺其太多倍前所收銅約每觔八分二三釐聞藩司原價亦有八分尙未問其清數也將來意欲承買四萬爲世兄分勞

多則不能定於運至德州或問子綸間屋或煩金父母  
借地俱無難事今連藩司者已將近二萬期於明年二  
三月買完在德州等候連脚價似每觔得八分半光景  
多亦不至相懸如有餘剩算清存繳如世兄有爲生代  
買之物照數扣留可也期比他人稍省始慊余懷耳其  
餘十月上旬到此始便恐往家轉發費事欲與秦公祖  
對支若彼計費一到則不能對矣買銅執照最要留意  
留意季報冊投部科其官禮若干司役之費若干宜密  
示一數以便詢問看其得實際否今卽向若老及震生

一言容知數後仍當一對甚便於後來也何如易澹兩  
處當轉致相注之意書辦用土著不過紙上具文大略  
防人相挾離關二三十里亦可用當取地方官印結爲  
妥耳鄭弁委係表姪若見署臬乞轉致云不佞原料旣  
係鄉里遇赦之事儘可從寬又經世兄鼎呂相囑知爲  
舍親定當稍存情分不意嚴駁若此不日當求海眉親  
家字相懇早做一情不意盛德陰隲之事乎十月內當  
到一江寧知縣吳汝亮係做同年最相厚者其人才品  
綽可勝繁邑之任但今之爲令甚難惟世兄凡百提撕

卯翼之至望至望廖含章忠厚好人代人受過可憐想  
可遇赦保全但未必有昭雪之力耳石竹齋最上等印  
色求寄三四兩分外多盛印油兩餘欲備用以有最好  
印色將乾也詳悉布衷不覺過俚惟心照不一馳切馳  
切光祀頓首

套言不敘今買銅連濟上者已得三萬四千餘觔其餘  
四下採買據言頗難然愚意欲足四萬之數不敢食言  
也但廢錢內多有康熙字者吾輩雖申飭之亦不能查  
恐不能不費調停耳對銀須紋泰老將來有人在此驗

收卽換廢錢亦論成色也在京收銀在濟南發銅銅秤  
自不得輕恐早運至德州無人看管須得買完與貴役  
尅日在交兌始爲妥便意此當爲明年正二月間事也  
女子可得其人否或一或二亦不必多惟厨子夫婦要  
緊昨徐公祖代買小厮二名甚感但其一甚小不能學  
歌如世兄覓有年十二三以上十六七以下貌美而喉  
清者爲購一人其用價若干自並厨婢銀同扣繳上然  
此一宗猶可緩必佳者乃妙耳草此寄復不盡馳切光  
祀頓首

若晤法黃老致意寄到兩札俱見矣前說已致澹脩其所云續送使用一項與部授受生從不諳萬乞別爲專托生効奔走可耳前齎差回付有報章想已入覽今盛使到兌銀三千四百業已收明法馬較此中行使平等每定輕五錢其銀足紋者十之七八餘亦九七八色在兌客中此爲上乘度俱可用所差無多也但東瞻之萬餘爲臨清關逼去未免又費零星湊買與來使相約期與明年四月中運抵德州不敢少怠錢銅萬不能檢點一律待先與工部商之或如何收錢或何樣廢銅或須

鑄鑄如其所言庶臨時不致刁蹬耳自隨時有信報聞法馬已增印記樣銀未曾索看刑命石會票約蠟中交兌法馬成色交後另報銅批存之分發族親繳可也劉周奠儀俱送訖所謂投工常例詢來役與內數相合據云甚妥亦不便再查讀新詩如相晤語慰慰印色甚佳謝謝吳海嶠年兄旣已上任其初政可教者幸開誠示之生近况如常更覺酬應忙迫全無臨書之暇此其所不樂也役旋草此奉復并候嘉祉馳切馳切光頓首獻歲後有一信由徐行老公祖函中寄去不知已達記

室否不佞二月內大爲駁雜背生一毒數日間幾至委頓今幸仗庇漸愈目下作膿生肌可望無事然近况亦良苦矣買銅甚難然不敢不勉託泰老公祖者業已催之彼有端差不敢久悞其餘托親戚有就近地採買此時尙亦無多俱約至四月彙送德州果能如期則妙若德州則不能購將來不能在四萬之上也銅價俱照八分半發訖九分之說且不必言若將來運德腳價不足自酌量算之可耳購人承世兄如此留心感感新差不知爲誰以病中不令傳知恐一聞外事不便於賤恙醫

者之言若此見手教侍海翁諸兄來看時卽託轉問而囑之入都亦不必太遲若慮稍稍過限路中取下一印結亦妥鄒父母乃多事之人與生頗厚見時當言之伏枕奉復不覺溢幅諸惟心鑒馳切光祀頓首  
久無便羽疎於寄候遙知近祉清勝念之馳結公餘詩興若何猶有臨池之暇耶茲小女之僕上京特詢福履因前月接邵長班一稟云王壻保舉疏於初旬到部有湖撫王題爲興山知縣清廉愛民等語彼時欲遣人達知年兄想爲日已久部覆已定故爾聽之乃彼任中至

今無一信至不知是真是假殊爲增悶懇祈留神一查如已經覆准則妙倘有別說或係虛傳亦求詳示以慰懸懸至懇至懇并祈致意令兄道相候之誠草勒不備惟心照爲禱真切真切光祀頓首

仵回接手翰具悉近祉爲慰王壻保舉事十月間楚撫始批允待督至會題費如許工夫今又停例尙未見貴部覆疏云何若保過與未保者無異則前案可以寢矣泰瞻公祖陞去吾東大失所恃近日省中光景漸不如昔往年地方要事此公猶肯直言吾輩公言猶肯相信

而今而後地方官與士夫交情廢矣安得有正人之論入當事之耳耶履端將屆年兄榮納新祥棗餅野味不足以佐辛盤見意而已致意令兄恕不揣函統惟心照馳切馳切光祀頓首

王壻叨知年兄近祉爲慰愚自二月病日至今百日未愈不但眸子眊焉抑且睨而視之旣無望於離婁之明豈復能知西子之美惟眼前茫茫無際足下俛俛何之耳可笑可憎年兄必聞而深愈之也茲敬懇者敝同年孟鏐壬午舉人見任濟寧學正歷俸已七八年計此後

陞期不遠乞年兄爲之及早留意斟酌於遲速上下之間或內而國學翰詹或外而邑令可免於遭醜者兩路皆可寬其途以便轉移最怕者恐淪落教授一寮耳彼有毛詩業已驗貯惟年兄之所用可應時而奉也今老同年之在仕途者鄴老之外止此一人甚爲關切不得不求年兄之仁拂也至禱至禱因日塗鴉字多難辨然而不敢倩書諸惟心照馳溯不一光祀頓首

數日前有小牋上候新社想達典籤此時小仵尙未歸也茲敬瀆者藩吏趙運隆齋計冊至京其人乃舍親也

特令專叩台端彼雖明白謹慎然初膺此任恐有未諳萬祈年兄百凡慈拂賜之指示或命紀綱導引之俾得善爲竣事免於過失借光多矣至懇至懇伏惟心照臨啟依切期光祀頓首

久未作書寄候興居馳慕不可言八月見令弟高發喜極距躍家門積德之報如是不爽夫人奈何而不汲汲爲善也自世兄復綜銓管遂覺吾鄉人情平風靜浪萬頃波瀾俱成安流爲政豈不在人哉不佞今年心緒最惡益覺衰老雖勉強消遣與自然者終不相同糊塗過



日而已敬候令兄納福恕不另啓祈致意野味二種聊  
佐辛盤希笑存之承畧不備諸惟心照翹切翹切光祀  
頓首

昨晚備語劉役今早卽往叩見年兄候至入署而同所  
言前後事已洞記之云歸卽悉陳求所以報命也如仍  
欲面諭乞使一人呼之明日想當令投冊耶附此先聞  
光祀頓首

午餘敬候榮陞幸勿他往且帶陞資一千爲望啓脩來  
世兄弟光祀頓首

十三日小酌餞子相乞年兄早臨園談敬此預啓脩來  
世兄閣下光祀頓首

連日未得晤教慕甚寶應令舍姪孫蕙以卓異應領袍  
帽不知若何領法乞示知以便遵領容謝不一光祀頓  
首

忙中有污佳扇繳上一笑近作附請斤政外具扇一柄  
煩賢姪大筆又聞送梁大宗伯詩悲壯爲諸公中第一  
乞用別紙錄示一覽爲感光祀頓首

濟上寄到一字想爲季霖之札敬奉上再乞發一回單

答泰瞻施公祖餘晤悉不一光祀頓首

恭喜想已啓事耶昨始見易老適甚乏共告匱不如爲少宰時遂未便言及也餘亦尙未得當奈何暫聞光祀頓首

連日未晤爲歉馮老先生欲賢姪書扇送之昨日又問當早覓一佳扇寫送也光祀頓首

少宗伯曹澹老年兄一扇求楷法爲寶乞乘興爲一書之借光多矣餘晤頌不一光祀頓首

敝門人爲其母求節壽詩粹不能得句敢借鴻章以文

固陋希撥冗一作被光多矣容晤謝不一光祀頓首

陸義山尊人壽詩媿儉腹不能成咏乞賜鴻章以光盛舉感不可喻矣如作律詩二首更妙容謝不一

大雨後尙未一晤想貴寓亦不愧屋漏耶曾記去年有獻醜拙文一冊內有墨義窻稿今妄意入選乞尋賜一查光祀頓

世兄得士之喜尙未趨賀貴房止見首卷其餘有錄出者乞示一覽又敝門人及親知落卷卽乞查賜以速爲感容謝不一光祀頓

數日未得晤教爲歉先奉托查平陰縣援納貢監程焯  
不記已送監否乞示再懇者如世兄有擬吾省題乞示  
一觀甚感光祀頓

小札并近作一帙乞轉致余公祖求正不敢往拜并祈  
諒之當於闈後投之爲妥也光祀頓

昨晚遜老年兄卽送此字乃甚相愛之意思也所云宜  
稍遲亦是再此奉覽昨卷乞早動筆用印賜下以便完  
此一事復之以慰其心光具

前走謝未獲晤教爲歉今柯岍初都掌科委作太夫人

壽詩捉筆不能成句萬乞年翁不吝鴻章代作一首感  
之不盡至禱至禱光祀頓

陸觀察祚蕃

龍門千里信使殊疎唯西望紫雲時深懷結茲荷老年  
臺不我遐棄翰貺遠加渥甚殷情彌慚疎節矣本擬馳  
候興居緣知榮發在邇尙期耑介長安布展賀悃寵錫  
敬拜一種心佩明德無窮矣別諭謹心識之憑穎感切  
周儀部襄緒

山茨接袂信宿荒齋嗣竚王猷雪棹再敘離索而征帆

近渡錢塘不識台旌何時北指也日緣冗襍未獲走別  
江干崙伴馳送懷念依依貴通家處叨及齒芬定當雲  
誼關切謝謝宅報已囑小僮攜送矣弟望後將有閩行  
前諭楊札未審可及帶去否如有緘發不敢浮沉也朔  
風珍重憑楮不聲

陸少伯菜

適間奉叩不值爲悵傲咨郭扶老以保債事復結訟於  
司寇之庭一二日內未能入署乞年兄爲之包荒感荷  
推愛匪淺扶老自當面頌大德也特此佈懇不一脩老

年兄大人小弟菜頓首

弟寢疾數日今早始能啜粥尊恙想已霍然前札至失  
答又不獲奉候爲罪家兄館事仍望年兄玉成不敢以  
煩他友也可否幸裁示之脩老年兄大人小弟菜頓首  
偶過沈康老寓齋得讀瑤章知爲謫仙後身敬服詞壇  
領袖矣未識肯慨賜一冊否春風蕭寺名卉奇松近咏  
必盈箱并求惠教舊刻數葉自慚鄙俚引玉爲勞不敢  
藏拙錦旋何日尙容趨送小弟菜載拜

偶有舍親到寓不能趨叩若佳章可以賜讀甚快甚快

否則明早當造尊齋也脩老年兄大人小弟菜頓首  
今歲同年壽分皆已不出蓋因舊年一週彼此往來已  
遍弟亦不敢獨異耳王夫了盃分仍祈補足何如候候  
譚太守吉璫

來諭領悉明出署即到彼奉候也特此復原札附上弟  
吉璫頓首

春秋題從來二單二傳至傳題皆兩比從未有一句者  
蓋石門與胥命瓦屋合若與別合雖旨中不載也順天  
新榜舊例必已查確乞明示切感切感特此甯母節無

傳主尊王通貢向爲左傳題今不用矣并及弟璫頓首

李明府楷

聖賢刪詩其作詩蓋甚寡尼父龜山操諸篇復聖未聞  
也予讀孝廉詩感神明之胄時中之學焉古無律詩而  
後世有之宋儒有言孔子未免應舉然則家訓可作詩  
亦可爲孝廉工於詩而尤絕口不談詩視矜夸學杜之  
輩汗背沾濡此先聖之不伐善不施勞人之所不能及  
者也七律在唐人之間恐唐人亦有所不及矣右詩序  
河濱李楷草書

尊照并大集草草題就深愧不文小冊反叨高詠真拋  
磚引玉矣謝謝梁溪錢礎日兄諱肅潤卽秦對巖太史  
受業師也有古文澱之選將次成書其館在敝府楓橋  
得便一訪之何如率復不莊  
先生見贈之詩奉爲至寶呈序時未見此柄所以未謝  
今大作已梓拙言無所用之正欲暢言尊溟區區急就  
淺淺短章何足存覽場前以小兒考試當至青門別爲  
弁跋表章作者小巫神盡不敢不勉耳方伯公祖愛我  
然不敢恃愛而作不通之前以董畫供清賞此畫原

主乃一不通世務之人且將官也以爲畫係家僮盜出  
康國泰原以寄賣與價買到二年餘矣告赴長安斷給  
原主畫在署中懇求擲下異日負荆請罪不一  
昨面請大作幸可備示今者爲五言古詩以將嚮往倘  
肯和我爲感尊作容以小序上也修來世師表楷頓首  
李進士嗣真

報國分袂屈指四月每一念及恍有塵世之隔則以弟  
與年兄情義之感真如水乳雖一日三秋而况四更冀  
莖也耶歸來窮愁落莫無一善狀雞啼蛙吟皆引愁緒

獨是飲食夢寐間常有一欣然而長嘯然而笑之人如  
爲晤對如爲嘔歌者動靜言語心能貌之卽弟亦不自  
知其所以然矣閒中欲爲歌行一首以紀吾兄弟遇會  
之始忘形之雅以及思念之切拈髭搜韻而愁懷亂之  
迄今未成如漾空遊絲引緒不及數尺而微風斷之終  
無尋常之觀如此景况良可慨矣及靜中微思求其所  
以之故不過一窮遂能造詣至此古人云詩必窮而後  
工何弟遂窮而至於無也吾兄近况不知何若想米珠  
薪桂之場亦未必不至攢眉矣老嫂到否卜居何所近

日有何善狀便中望示知之陝中貴同宗會求幕中人  
歸與家君言之意欲一往求吾兄一贊其間不知可否  
如稍可爲之望老兄極力慫湧爲妙也如貴同宗有慨  
允之意其中周旋亦望吾兄先爲之地蓋泄柳申詳所  
以安身之道應如是耳想年兄亦必代弟爲謀也相望  
之意累紙不盡旅次匆匆不勝神往矣敬上修翁顏老  
年兄閣下弟李嗣真頓首拜

呂繇侯考

兩次汚素糸方棟仄未已復承重委敢不赧面報命但

恐有損諸葛公盛名耳明蚤書就來取可也佳什已得  
杜髓游夏烏能贊一辭哉示我指南矣佩服佩服晚繇  
頓復

連爲病縛不得過晤爲恨三舍弟已於初十南旋矣過  
蒙寵賜感甚感甚茲有友人張兄工部咨文已於十四  
到貴部祈推分蚤咨送監天寒貧生思歸心切也囑切  
囑切容面謝不既前孔生已邀炤拂並謝繇晚頓首  
出場後賤恙更劇遂不得趨謝也尙有要言奉商俟遲  
一二日再面悉茲以敝友人之子入雍聞今日戶部咨

文到貴部求推分卽命書役移咨蚤一日則見台愛矣  
容面謝不既繇頓

屢造謁屢相左耿耿歉歉繇今以乏資難歸暫完館事  
館在城內王府二條衚衕筆帖式王名信家繇之屢屢  
奉叩相商者無他求爲謀一讀書地新正後諸學使俱  
換能于新公處一薦得借看卷理我舊業則感德宜有  
既耶秘之秘之此懇晚繇頓

向爲呂年兄奉懇當事一函因呂年兄行迫未得就緒  
昨又有字來索祈年翁便中卽爲草出一可完繇口面



二亦可少爲年翁生發幸慨賜爲荷繇十三蚤必行矣  
再圖晤謝不盡倘恐有誤繇當立字爲質也其名空之  
再填可耳脩翁老年翁繇頓

在都屢承厚愛感感出都時曾兩辭台階并求當事一  
函想尊冗未得慨發後匆匆策蹇弗獲面別至今耿耿  
法帖釋文向未錄完笥中又檢得一冊附寄去其餘當  
另呈也行人甚迫不多及令兄先生幸叱名繇頓  
譚太守吉瑄

今日當往拜並看令叔先生聞今日大駕進城故復中

止明日上行李想亦不能來園十七日無事同令叔先  
生來聚談半日亦快事也天涯知己會晤良艱知有同  
心故不敢以套帖奉請定當笑而諒之耳何如何如此

季翁先生  
脩翁親臺均覽小弟瑄頓首

旬日不辱過臨想望不已命老傳愛諭想已達之徐公  
祖乎今姑看其自處若何再當以字往聞耳向所云詞  
林胡璞老欲求允老相爲之意爲其有北山翁淵源之  
自也親臺常相見仍求一言先達之弟畏熱不能往晤  
卽拜之亦未必卽會也何如何如今因清源栢老親翁

蘇氏家藏尺牘卷一  
三  
慕高雅而請教敢以字聞天涯戚里一見如故轉覺弟  
言之爲多也一笑暑瀉草草幸亮弟瑄頓  
弟自初三日擾回卽重傷風鼻塞痰嗽至今尙未豁然  
是以聞令叔先生違和未得躬候爲罪也因思令叔旣  
來當爲設處歸資仍以前日勞帖所送之程舍親一事  
再煩一札致之願照許虞老之數爲令叔車馬之費此  
亦不勞而得之也弟亦可自往一囑特爲尋事不出巧  
爲親臺一力耳如可行乞呼舍親入內細商行之若公  
冗未暇可命趙掌家持尊帖來舍當面議妥確而後入

告斷不浪漫從事也何如何如令叔若愈祈過舍一歡  
幸致聲附香圓八枚用見同香之意弟瑄頓首

黃孝廉垵

接手教知老年伯捐館舍可勝震悼延羸之餘不能趨  
弔亦未遣一介少伸雞絮之誼殊覺愧懼交集也伏讀  
行述撫膺歎服老年伯生平慷慨忠孝真足千古且子  
姓繁多簪笏濟濟天之報善人可爲厚矣孔老年翁以  
聖裔高賢爲東方師表墨人士仰賴實多世兄亦復英  
年磊落是皆欲數共晨夕者惜病臥蓬蒿不敢辱先生

長者之駕然令德高風子弟輩且口道之矣容小愈卽  
當負笈請教也壬子秋蒙年兄遠惠詩箋未獲答和今  
復垂清問五年之內兩承慰藉而狼狽如初感念疇昔  
惟有伏枕浩歎而已弟病中無所事事里曲巷謠聊以  
自遣乃令大巫見之已使我頽然喪氣而猥云必傳得  
非愧我乎年兄讀禮家居暫終喪制公孤重望朝廷方  
虛左以待千秋之業是在今日弟且拭目俟之矣蕪詞  
一闕書箋呈教惟斧削之便中賜和爲感臨楮曷勝馳  
結

黃御史敬璣

小兒歲內過擾郇厨深爲感勒當茲春光明媚知新履  
佳勝愧病軀家食不能共領畧長安花柳耳倘秋間得  
愈卽當躬侍言笑也茲因蜚公丁年翁之便率勒奉候  
蜚公與弟相知最深今違限數日恐有未便乞親臺多  
方維持卽弟身受榮賜矣又聞前歲誥封已有頒行者  
仍祈留神爲感草草空函幸惟台鑒臨穎北望不盡欲  
言

玉律乍回椒觴初獻親臺茂祉誕膺百福駢集不察可

知也弟以十年客寄之身今得度歲里門聊可自慰但遙瞻燕門紫氣未免時切顛注耳茲因唐帝老北上附此奉候帝老有事都門倘可爲之周旋者祈親臺多方指南至於長安一切事有可相聞乞頻爲示知俾草野閒人得與聞京師近事感佩無量矣蓋總河李提塘處有弟報本可以頻爲郵致也總河清正和平一切體統俱循漢人舊例東土自此有福星矣附聞不悉

兒輩入都叨蒙雅愛奈不才有負栽培何弟擬今歲北行而又以小恙滯留明春當面領大教也茲因羽便率

候近禧兒輩落卷借仗鼎力查寄其中或有小費亦祈親臺代用卽奉償也連后場查出更妙如止前場亦可草此奉懇統惟丙照不悉

東野廩生雲鵬

寒門幸叨 帝眷恩至渥矣而諸務周全者實出自老親家培植以湊成一代盛典也前拜讀瑤翰深感垂念銘刻高深曷云所報耳小兒赴都多日矣凡部疏議定之事想已妥就但祭田一事本省藩司甚屬掣肘其所撥之地盡係水滄山岡千年不茅者若不乘今煩爲改

撥恐致後流爲虛具至于修廟估計之物價與附廟戶  
役之數額俱尙未有定論總之弟族蕭瑟諸道所司一  
無以應故致施發遲遲耳惟望老親家終始周全鉅細  
照拂則老親家之弘仁大義當與 盛世之殊恩并垂  
於千萬禩而子孫實世世受其賜矣肅此布懇不盡欲  
言臨池曷勝瞻溯之至

魏明府煜如

久未覲芝眉五內慙切鳧趨莫由徒深葵傾耳恭聞親  
翁德望日隆賢聲茂著金甌之下應卽在指日間也茲

因犬子入監躬叩崇墀其一切事宜伏乞多方指示曲  
賜玉成骨肉至愛當永矢弗諉矣附具八行恭候鴻禧  
不盡濶悰統希睿炤臨穎無任馳依

顧處士炎武

仙舟一晤良豁積懷王程靡及不獲攀留信宿以罄願  
言猶爲耿耿耳所寄書板乞付去俾家訓如命勘正容  
於秋仲入都面奉率此附候不悉  
弟向日錄有古今集論五十卷頃充李劉年翁延弟至  
署刪取其切於經學治術之要者付諸梓人名曰近儒

名論甲集因此淹留尚有旬月如貴地友人家有鄴架  
之藏欲一就觀且得以晤言講習尤幸事也日下欲借  
唐荆川稗編第一套抄錄幾首未知可轉覓否大小阮  
才名已達之當事如便中至郡可投一刺極相企慕也  
新詩并乞惠示以便奉揚休譽燭下草此附啓不盡吉  
人超宗兩社翁併希叱致

去秋得接光塵恨首路匆匆未獲信宿之留以聆微言  
而商大業至於四方同人遙相問訊無不仰贊鴻才以  
爲今代復有知十之姿庶幾之品也仲春偶過宛署未

得親詣闕里再侍雅譚專俾賫所刻韻譜呈正大方至  
前日所留詩本音稿係未改定之書其中有舛誤者姑  
寫二條附上閱過粘卷內付還他日當攜全書奉觀更  
求指誨耳率爾未盡

弟以今六月至雁門時李君天生自關中來言修來社  
翁在方伯署中不多會客初秋入都而敝鄉沈繹老亦  
自關中來交相推許計太華終南之勝二嶠函谷之阻  
周秦漢唐之蹟並已收而載之行笈矣山史兄及楊王  
兩敝門人並得一見否石珍杜翁想閉戶著書臥游五

嶽胸中當別具一邱壑而鴻文大製日新富有則兩君  
固並驅中原矣弟頃至岱下俟主人之歸卽過宛郡先  
此奉候并問秦中諸子消息所留詩本音乞附下已大  
加刪改將以新本就正也諸容面悉不旣百一  
老年臺旣晉秩寅清而令兄復駿蜚東國凡在知己莫  
不欣怵弟以訟事未了尙缺叩賀茲有德州方山謝年  
兄入都附此申候方山爲內院清義公之冢翩翩文  
雅更能熟於古今少年中鮮其儔匹屬以蔭職赴部一  
切仰祈照拂緣弟夏秋主於其家昕夕對譚心所歸依

惟在門下至於居官涉世之道亦望時時提命貴鄉才  
俊可爲後勁不俟弟言之畢也冬杪圖晤不悉中懷  
在都時極荷惓惓之愛今姜元衡攀及弟名具題請  
旨弟已赴濟南投到矣先有一札致譚年翁業詳此事  
始末念知己聞之必倍懇切謹此布啓前沈天甫所指  
造陳濟生逆書有序有目有詩有傳原狀稱共三百一  
十六葉今元衡所首之書無序無目無詩止傳一百餘  
葉知部中原書已燬刪去天甫狀中已經摘出者稱另  
是一書據元衡南北通逆情由一揭欲借此書另起一

大獄而羅書內有名之三百餘人於其中以翻主僕名分之案不知就此百餘葉中篇篇有濟生名則卽此一書之明證也奉旨爲沈天甫指造之書卽已故之陳濟生尙屬誣罔而況餘人乎弟敢不惜微軀出而剖白此事尤望大君子主持公論此札仍乞傳與譚年翁一觀升以告諸吳越之同聲氣者廣韻留程宅候取不盡康熙七年二月十五日在京師慈仁寺寓中忽聞山東有案株連卽出都門於三月二日抵濟南始知爲不識面之人姜元衡所誣姜元衡者萊州卽墨縣故兵部尙

書黃公家僕黃寬之孫黃瓚之子本名黃元衡中進士官翰林以養親同藉揭告其主原任錦衣衛都指揮使黃培見任浦江知縣黃坦見任鳳陽府推官黃貞麟等十四人逆詩一案於五年六月奉旨發督撫親審事歷三載初無干涉忽於今正月三十日撫院審時稟稱有忠節錄卽啓禎集一書元衡口供啓禎集二本皮面上有舊墨筆寫忠節錄字樣陳濟生所作係崑山顧甯人到黃家搜輯發刻者咨行原籍逮證據其所告此書中有黃御史宗昌卽坦之父傳一篇有云家居二年握髮以終以爲坦父不會剃頭之證有



顧推官咸傳一篇有云晚與甯人游有云有甯人所爲  
狀在以爲甯人搜輯此書之證不知此傳何人授稿何  
人親見刻板見在何處此書得之何方面就此握髮一  
語果足以證已故二十餘年黃御史之不剃頭否就此  
與游二語果足以證甯人之卽顧甯人又卽搜輯此書  
之人否且讀邸報此書已於六年二月曾經沈天甫出  
首矣請畧言之昔做郡有陳明卿先生諱仁錫以壬戌探  
花官至國子祭酒好刻古書有資治通鑑大學衍義等  
書一十二種行世其子濟生亦好刻書濟生已故有光

棍施明者從海外來與沈天甫等合夥偽造此書假已  
故陳濟生之名而羅江南北之名士巨室於其中以爲  
挾害之具又偽造原任閣輔吳姓一序以騙詐其子見  
任中書吳元萊奉 旨圈議部議書內有名之人共七  
百名內有寫序寫詩譏傷 本朝之人五十餘名合行  
查究奉 旨沈天甫夏麟奇呂中逃走之施明未來之  
吳石林及代主控告之葉大等合夥指造逆詩肆行騙  
詐雖稱逆詩從海內帶來茫無憑據又云編詩之陳濟  
生久經物故而從海內帶詩之施明又經逃走此等奸

棍嚇詐平人搖動良民誣稱謀叛以行核害大千法紀爾部卽將沈天甫夏麟奇呂中葉大俱行嚴審擬罪具奏逃走之施明未來之吳石林俱着嚴行緝拿獲日也着擬罪具奏刑部審得沈天甫等供稱騙詐吳中書銀二千兩未給將此書出首欲圖三品前程是實奉旨將沉天甫夏麟奇呂中葉大四人于閏四月二十二日押赴西市處斬施明吳石林緝拿未獲今元衡所首之書一百二十餘葉與沈天甫之三百一十六葉者雖刪去頗多而詩卽啓禎之詩傳卽此詩之傳編造之人卽

陳濟生其爲一書不問可知也恭繹明旨不直曰編詩之陳濟生而加以又云二字又云者據沈天甫之所云是已故之濟生 聖明猶燭其誣罔而元衡欲以此牽事外之人而翻久定之案其南北通逆一稟云據各刻本山左有丈石詩社有大社江南有吟社有遺清等社皆係故明廢臣與招羣懷貳之輩南北通信書中確載有隱叛與中興等情或宦孽通奸或匹夫起義小則謗讟大則悖逆職係史臣宜明目張膽秉筆誅逆故敢昧死陳揚逆刻種種罪在不赦北人之書削我 廟號仍

存明號且感憤乎鴟張虎豹乎王侯南人之書以我

朝為東國為虎穴以偽王為福京為行在北人之書曰

斬虜首

黃培刻郭汾陽王攷傳中有斬首四千級捕虜五千人乃子儀敗安祿山兵紀功之語 權

胡姬征鐵嶺

黃培詩有云怨女金閨裏征夫鐵嶺頭

殺金微又有思漢威

儀紀漢春秋南人之書有黃御史握髮一傳又有起義

有舉事有勸衡王倡義及迎魯王浙東王上益王等事

又有吳人與魯藩舟中密語又有平敵將軍有懸高皇

帝像慟哭及入閩入海等事北人之書有含章館詩集

友晉軒詩集夕霏亭詩郭汾陽王攷傳南人之書有啓

禎集卽忠節錄歲寒詩東山詩史做文信國集子美句

百八十章其北人則黃培所刻十二君唱和序跋等人

其南人則啓禎集所載姓名籍貫俱在刻本中約三百

餘人是元衡之意不但陷黃坦陷顧甯人而并欲陷此

刻本有名之三百餘人也不知元衡與已斬之沈天甫

逃走之施明何親何故何以得此海內帶來之書而前

唱後和如出一口其與不識面之顧甯人刻本有名之

三百餘人何讐何隙而必欲與黃氏之十二君者一網

而盡殺之推其本意自知以奴告主之罪律所不赦欲

別起一大獄以陷人而爲自脫之計遂蹈於明旨所謂嚇詐平人搖動良民誣稱謀叛以行挾害者而不覺也天道神明不僭不濫今于三月四日束身詣院投到伏聽審鞠至教唆陷害別有其人尙容續布統惟詳察江南布衣顧甯人頓首

魯公書家廟碑多寶塔碑爭坐位帖俱在西安府學俗所謂碑洞者其所書郭敬之家廟碑在布政司奉使蔡州題字并石刻像在同州臧懷恪碑在三原縣碑洞中石經及漢唐字但有錢即可買不必用官府惟各州縣

古碑非官府不能致然多是唐碑惟郃陽漢曹全碑極佳其他若麟遊之九成宮碑長武之虞恭公碑俱佳若多印得曹虞二碑各一幅見惠最感

申鳧盟名涵光永年人太僕公之長子今庶常隨叔之兄也太僕公甲申殉國難路安卿名澤濃曲周人故總漕皓月公之子聞近日亦在府城任如不遇此書卽留申宅孫徵君名奇逢字啓泰容城人今住輝縣萬歷庚子舉人今年八十三河北學者之宗師也王無異名宏撰一字文修號山史華陰縣西岳廟南小堡內

故少司馬公之子關中聲氣之領袖也 楊伯常名謙  
故王孫也住西安府南八里大塔堡內大塔者慈恩寺  
塔也或駕在藩司署中則求於到日卽遣人致之 何  
虛子公祖以臺中出爲關內道銜籍俱列便覽其衙門  
在布政司內 共書六封各送韻譜一本伯常則二本  
故有七本  
赴東六首

萊人姜元衡訐告其主黃培詩獄株連二十餘人又以  
吳郡陳濟生忠節錄二帙首官指爲炎武所輯書內有

名者三四百人炎武在都聞之亟馳投到幽繫半載撫  
院劉公審鞫卽去年奸徒沈天甫陷人之書得蒙開釋  
因有此作 人生中古餘誰能免尤悔况余庸駑姿側  
身涉危殆竊窺起東嶼長鯨翻渤澥斯人且魚爛士類  
同禽駭稟性特剛方臨難詎可改偉節不西行大禍何  
絲解 行行過瀛莫前途憩廣川所遇多親知搖手不  
敢言爾本江海人去矣自足全無爲埒虎鬚危機竟不  
悛下有清直水上有蒼浪天且起策青驪夕來至華泉  
苦霧凝平臯浮雲擁原隰峯愁不注高地畏明湖溼

客子從何來，徬徨市邊立。未得訴中情，已就南冠繫。夜  
半鷓鴣鳴，勢扶風雨急。廷尉望山頭，嗟哉亦何及。荏  
苒四五日，乃至攀髯時。夙興正衣冠，稽首向陵墀。詩人  
岸獄中，不忍恭敬辭。所秉獨周禮，顛沛猶在斯。北斗臨  
軒臺，三辰照九疑。可憐訪重華，未得從湘纍。羲仲殷  
東方，伶倫和律管。陰崖見白日，黍谷回春煥。柔艣下流  
澌，輕車度危棧。草木皆欣欣，不覺韶光晚。大造雖無私，  
薰蕕不同產。奈此物性何，鳩化猶鷹眼。天門詆蕩蕩，  
日月相經過。下閔黃雀微，一旦決網羅。平生所識人，勞

苦云無他騎，虎不知危聞之。元彥和尚念田畫言此舉  
豈足多，永言矢一心不變同山河。

顏氏家藏尺牘卷一終

